



Luta Hamutuk

INSTITUTU BA PESQUIZA/INVESTIGASAUN, ADVOKASIA NO KAMPAÑA
Timor-Leste Institute for Research, Advocacy and Campaigns

Add: Rua Gov. Celestino da Silva-Farol, Aldeia Lirio, Suco Motael, Vera Cruz, Dili

Email Add: {**HYPERLINK**

"mailto:lutahamutuk2005@yahoo.com"}

PO. BOX: 1034, Correios, Dili, Timor-Leste

Tel: (+670) 332 2619 or (+670) 724 5063, 726 3783 & 724 3966

KOMUNIKADU DA IMPRENSA

**Governo no Kompania Laiha Komitmentu klaru hodi Garantia
Transparansia no Akuntabilidade Iha Industria Mina No Gas**

Introdusaun

Saida mak Extractive Industries Transparency Initiative (EITI)? EITI nudar inisiativa no standar global ida husi nasaun sira nebe mak riku ho mina no gas, ho nia objetivu jeral mak atu realiza transparansia no akuntabilidade iha areia industria mina no gas no mineral sira seluk.

EITI nudar koalisaun ida husi stakeholders sira, mak kompostu husi Governu, Sociedade Civil no Kompania Mina. Koaliasaun ida ne'e mos hetan apoia finanseiru no politika husi nasaun bot sira hanesan Amerika no Norwegia, Instituisaun Internasional sira hanesan Banku Mundial no ONU, nomos husi Investidor Internasional sira. EITI hetan apoia husi komponente hirak ne'e atu garante ninia prinsipiu fundamental mak atu realiza transparansia no akuntabilidade ba iha nasaun sira mak riku mina no gas ho mineral sira seluk. Depois de konferensia Internasional EITI iha tinan 2006 iha Oslo, stakeholders EITI sira decide hodi harii Secretariadu Internasional EITI nian iha Oslo.

Timor Leste hari ona Grupo Servisu EITI nian nebe mak kompostu husi: Representante Governu Timor Leste, Representante Sociedade Civil, Representante Kompania Industria Mina mak halo nia knar iha Timor Leste, grupo interesando sira/Stakeholders iha forum ne'e ninia posisaun hanesan no bazeia ba karakter voluntarismu. Nebe ho sira nia knar ida-idak, mak hanesan: Kompania mina no gas presiza reporta ba publiku saida deit mak sira selu ka fo ba Governu. Governu presiza reporta ba publiku konaba rendimentu saida deit mak sira simu husi kompania mina no gas. Sociedade Civil sira nia posisaun mak atu halo Monitor ba prosesu no resultadu hirak ne'e hotu. Bazeia ba inisiativu EITI, ba nasaun hirak nebe mak tama kategoria riku iha industria

naturais rekuinese katak benefisiu importante balun sei bele hetan husi EITI. Hanesan minimiza deskonfiansa no konflitu, dezenvolve kapasidade atu maneja revenue no rekursu, hasae reputasi internasional liu-liu relasiona ho asuntu transparante no akutablidade e manajementu ekonomia. Nomos kona ba oinsa atraí investidor sira.

Kondisaun aktual EITI Timor Leste

Durante monitoramentu Luta Hamutuk nian ba EITI hare katak prosesu durante tinan ida ne'e, Timor Leste tama ona iha fase Sign up ba membru kandidatu ba Implementsaun EITI nia. Saida mak Timor Leste persija halo hodi alkansa prosesu ne'e? Tuir template mak EITI Timor Leste halo mak waihira atu hetan nia validasaun iha tinan oin mai, no agora dau-daun stakeholders husi working group EITI sira hotu-hotu esforsu an atu halo hotu template hodi nune'e bele halo reportazen premeiru iha 2009 ne'e. Oinsa prosesu halo template ne'e? Durante ne'e membru EITI sira hanesan Sociedade Civil, Governu no Kompania Mina nebe mak halo eksploitasaun iha area JDPa no Area soberanu halo ona sira nian template e konsege halo ona debates ba template hirak ne'e iha inkontru EITI. Maibe saida mak akontese? Iha prosesu debates template ne'e membru EITI nian Seidauk hetan konsensu ba template nebe bele sai hanesan konkordansia hodi bele halo reportazen. Iha monitoramentu Luta Hamutuk ninian ne'e hare katak Governu no kompania la konkorda ho template nebe mak Sociedade Civil sira aprensenta. Template mak Sociedade Civil sira aprensenta ba forum EITI nian mak template Disaggregate nebe signifika katak kompania tengki reporta ho detailadu no nian break down hanesan ba taxes, contract fees, signature bonus, no seluk-seluk tan tengki iha nia break down e Governu mos tengki reporta hotu saida deit mak sira simu husi kompania mina sira ho detailadu no ho nia break down tuir saida mak kompania selu ba Governu. Iha parte seluk Sociedade Civil mos hakarak resultadu husi reportazen EITI ne'e tengki publika ba Publiku, hanesan mos parte importante ikus husi objetivu EITI nian. Maske nune'e, iha parte seluk Governu ho kompania mina sira konkorda mos ho reportazem disagregate, maibe la deitaladu hanesan template nebe mak Sociedade Civil proposta. Kompania mos la konkorda ho reportazen nebe mak tengki publika ba publiku, tuir kompania sira balun, reportazen EITI ne'e reporta ba internu EITI nian laos atu publiku hotu.

Tuir Luta Hamutuk ninia monitoramentu hare katak, Governu mak seidauk iha posisaun klaru hanesan autor importante iha EITI. Maske Governu deklarada dala barak ona katak sira iha komitmentu atu garantia transparante no akuntabilidade iha industria mina no gas. No saida mak akontese waihira seidauk iha template ida nebe klaru hodi halo reportazen? Waihira la iha konsensu ba template ida hodi bele sai hanesan baze hodi halo reportazen, se ida ne'e la akontese EITI Timor Leste se faila no Timor Leste la sai kandidatu ona no waihira Timor Leste hakarak sai fali kandidatu tengki tuir fali prosesu foun komesa husi inisiu. Se idane'e mak akontese, impaktu ba Timor Leste saida? Impaktu akontese maka, Governu fakar deit orsamentu povu ninian hodi halo prosesu EITI iha Timor Leste, no la iha responsabilidade ba orsmentu ne'e. Kredibilidade Governu Timor

Leste lakon iha mundo Internasional nia oin, nomos sei hamosu deit deskonfianca no bele hamosu mos korupsaun iha industria mina no gas.

Rekomendasaun:

Bazea ba preokupasaun hirak ne'e, Luta Hamutuk nebe mak durante ne'e halo monitoramentu ba EITI hakarak rekomenda Pontus rekomendasaun ba Governu hodi bele alkansa objetivu EITI nian iha Timor Leste, rekomendasaun hirak ne'e mak hanesan tuir mai ne'e:

1. Rekomenda ba Governu atu kolia transparante no akuntabilidade iha area industria mina no gas tengki ho pratika laos retorika deit
2. Rekomenda ba Governu atu foti posisaun klaru no firmi atu nune kompania sira bele tuir modelo transparansia nebe mak detailu no komprehensivu. Ijemplu mak hanesan proposta husi Sociedade Civil sira kona ba proposta reportazem detailu no komprehensivu liu husi Template EITI
3. Rekomenda ba Governu no kompania atu konkorda ba template Disaggregate mak propoin husi Sociedade Civil nian. Tamba template ida ne'e mak transparante no akuntabel liu, tuir Luta Hamutuk ninia perspektiva
4. Rekomenda ba Governu no kompania atu hatudu duni sira nia komitmentu hodi Implementa EITI iha Timor Leste
5. Rekomenda ba Governu no Kompania atu reportazem EITI tengki publika ba publiku atu ema hotu-hotu bele asesu ba reportazem ne'e.

Rekomendasaun hirak ne'e Luta Hamutuk hanoin katak bele kontribui ba prosesu no objetivu EITI nian iha Timor Leste hodi garantia transparante no akuntabilidade. Se la iha konsiderasaun ba rekomendasaun hirak ne'e, Luta Hamutuk hanoin katak prosesu transparante no akuntabilidade iha industria Mina no gas sei sai hanesan Mehi deit.

Dili, 5 de Maio 2009

MERICIO AKARA
Direitor
Instituto Luta Hamutuk
Timor Leste